

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
Broj: 43 0 St 268975 25 St
Zenica, 12.08.2026. godine

Općinski sud u Zenici, stečajna sutkinja Sanja Pavlić, u stečajnom koji je pokrenut po prijedlogu predlagatelja Nova Željezara Zenica, d.o.o., ul. Bulevar Kralja Tvrtka I broj 17., koga zastupa Ahmed Hamzić, generalni direktor društva, MBS: 43-01-0364-09 (stari broj 1-7460), odlučujući o prijedlogu stečajnog dužnika, donio je van ročišta, 12.08.2026. godine sljedeće:

R J E Š E N J E

OTVARA SE STEČAJNI POSTUPAK nad imovinom stečajnog dužnika Nova Željezara Zenica, d.o.o., ul. Bulevar Kralja Tvrtka I broj 17., glavni račun stečajnog dužnika otvoren kod UniCredit bank d.d. Sarajevo, broj: 3389002207278563, 12.08.2026. godine u 15:00 sati.

Za stečajnog upravitelja, sa liste stečajnih upravitelja, imenuje se Jasmin Hadžirašidović, ul. Prve zeničke brigade 152., Zenica.

Pozivaju se vjerovnici da u roku od 30 dana od dana objave ovog rješenja u „Službenim novinama“ Federacije BiH, prijave svoje tražbine koje imaju prema stečajnom dužniku podnošenjem prijave Općinskom sudu Zenica na broj: 43 0 St 268975 25 St, uz uplatu sudske takse u iznosu od 1% od vrijednosti tražbine, ali ne manje od 50,00 KM, niti više od 10.000,00 KM na račun budžeta ZE-DO kantona broj:134-010-0000001672, vrsta prihoda 722221, budžetska organizacija 1606001, općina 103.

Podnositelji prijave uz prijavu trebaju navesti svoju firmu, sjedište, boravište, pravni osnov i iznos tražbine, kao i broj svog računa kod poslovne banke.

Pozivaju se vjerovnici da stečajnog upravitelja u roku od 30 dana obavijeste koja prava osiguranja potražuju na predmetima i imovini stečajnog dužnika, navođenjem predmeta nad kojim se potražuje pravo osiguranja, vrstu i razlog nastanka prava osiguranja, kao i osiguranu tražbinu.

Pozivaju se dužnici stečajnog dužnika da svoje obveze bez odlaganja izmire.

Nalaže se stečajnom dužniku i trećim osobama da stečajnom dužniku predaju u posjed imovinu i dokumentaciju stečajnog dužnika koja je u njihovom posjedu.

Nalaže se registru poslovnih subjekata ovog suda da uz firmu ili naziv stečajnog dužnika izvrše upis oznake „u stečaju“, a u rubrici „Lica ovlaštena za zastupanje subjekta upisa“ umjesto imena i prezimena direktora, upišu ime i prezime stečajnog upravitelja.

Nalaže se zemljišnoknjižnim uredima i nadležnim katastarskim operatima, kod kojih se vode nekretnine stečajnog dužnika, da izvrše upis rješenja o otvaranju stečajnog postupka.

Ispitno i izvještajno ročište u ovom postupku zakazuje se za 08.12.2026. godine u 10,00 sati, u zgradi Općinskog suda Zenica, te se na isto pozivaju vjerovnici stečajnog dužnika koji podnesu prijavu tražbine, kao i stečajni upravitelj.

Rješenje o otvaranju stečajnog postupka objavit će se na oglasnoj tabli suda, web stranici suda-elektronskoj tabli suda, na internet stranici FIA-e, a u „Službenim novinama“ Federacije BiH objavit će se izreka rješenja.

O b r a z l o ž e n j e

Društvo Nova Željezara Zenica, d.o.o., ul. Bulevar Kralja Tvrtka I broj 17., koga zastupa Ahmed Hamzić, generalni direktor društva, podnijelo je prijedlog za provođenje stečajnog postupka 17.12.2025. godine. U prijedlogu se navodi da se društvo već duži vremenski period nalazi u stanju insolventnosti odnosno platežnoj nesposobnosti ispunjava svoje dospjele obaveze u zakonskom roku, štp predstavlja osnovni razlog za pokretanje prijedloga za otvaranje stečajnog postupka, te da dospjele obveze dužnika na dan 31.12.2024. godine iznose 337.427.277,00 KM, bez zakonskih zateznih kamata, a sa 30.11.2025. godine iznose 350.796.925,00 KM, da je trenutno ugroženo održavanje tehnološkog procesa, nabavke

sirovina, smanjene isplate dobavljačim, otežane isplate plaća i ostalih primanja radnika koje se finansiraju iz pozajmljenih sredstava.

Sud je 11.02.2026. godine donio Rješenje o pokretanju prethodnog stečajnog postupka i za privremenog stečajnog upravitelja imenovao Hadžirašidović Jasmina sa liste stečajnih upravitelja.

Sud je 19.03.2026. godine, radi ispitivanja ekonomsko-financijskog stanja stečajnog dužnika odredio vještačenje po vještaku financijske struke Babić Adisu iz Zenice.

U svom Nalazu i mišljenju sudski vještak je naveo da na dan 31.12.2025. godine kod pravnog lica NOVA ŽELJEZARA Zenica d.o.o. postoje: obilježja trajnije nesposobnosti plaćanja, koja se ogledaju u kontinuiranoj nemogućnosti urednog i pravovremenog izmirivanja dospjelih obaveza, izražen nesrazmjer između dospjelih obaveza i raspoloživih likvidnih sredstava, te značajna prezaduženost i narušena kapitalna struktura.

U predhodnom stečajnom postupku privremeni stečajni upravitelj Jasmin Hadžirašidović sačinio je 24.04.2026. godine, Izvještaj privremenog stečajnog upravnika o postojanju razloga i uslova za otvaranje i vođenje stečajnog postupka nad privrednim društvom Nova Željezara Zenica, d.o.o. u kojem je naveo da kod stečajnog dužnika postoje razlozi za otvaranje stečajnog postupka iz čl. 6. Zakona o stečaju-platežna nesposobnost dužnika, jer stečajni dužnik 60 dana neprekidno ne izmiruje svoje dospjele, a potraživane novčane obaveze, da stečajni dužnik odnosno organ ovlašten za zastupanje stečajnog dužnika je podnio prijedlog za otvaranje stečajnog postupka u roku od 60 dana od dana upisa u sudski registar kao organ ovlašten za zastupanje, da stečajni dužnik posjeduje imovinu koja može pokriti troškove stečajnog postupka, te da se poslovanje stečajnog dužnika može nastaviti u cjelini do momenta gašenja visoke peći, a nakon njenog gašenja može se nastaviti djelomično, u obimu i na način koji će biti utvrđen u daljem postupku prethodnog postupka, a koji će biti u interesu stečajne mase i povjerilaca.

Na ročištu održanom 25.06.2026.godine, punomoćnik predlagatelja je izjavio da ostaju kod prijedloga za otvaranje stečajnog postupka i da nemaju primjedbi niti na Nalaz vještaka niti na Izvještaj privremenog stečajnog upravnika.

Privremeni stečajni upravitelj je na ročištu održanom dana 25.06.2026.godine, izjavio da ostaje u cijelosti kod Izvještaja o postojanju razloga i uslova za otvaranje i vođenje stečajnog postupka nad privrednim društvom Nova Željezara Zenica d.o.o. Zenica, te sve navode, utvrđenja i zaključke sadržane u istom u potpunosti potvrđuje. Izjavio je da je nakon donošenja mjere osiguranja od strane suda, kontinuirano na dnevnoj osnovi, bio uključen u praćenje poslovanja stečajnog dužnika, u cilju zaštite imovine i interesa povjerilaca, te u skladu sa izrečenom mjerom davao prethodne saglasnosti upravi za preduzimanje pravnih i poslovnih radnji, vodeći računa o zakonitosti postupanja i očuvanju stečajne mase. Što se tiče mogućnosti cjelovitog ili djelomičnog nastavka poslovanja stečajnog dužnika, podneskom od 10.04.2026. godine, istaknuto je sljedeće: u postupku prethodnog ispitivanja uslova za otvaranje stečajnog postupka nad dužnikom Nova Željezara Zenica d.o.o. Zenica, izvršen je uvid u stanje poslovanja, sa posebnim fokusom na mogućnost nastavka obavljanja djelatnosti u toku trajanja prethodnog postupka, te na osnovu informacija i podataka dostavljenih od strane uprave društva u periodu do 20.03.2026. godine, proizilazilo je da dužnik aktivno obavlja osnovnu proizvodnu djelatnost, da su ključna proizvodna postrojenja, uključujući visoku peć i prateće tehnološke procese, u funkciji, te da postoji kontinuitet proizvodnje i organizacije rada, bez neposrednih tehničkih prepreka za nastavak poslovanja u kratkom roku, te je prema tim informacijama i podacima, snabdijevanje osnovnim sirovinama i energentima bilo relativno osigurano, uz određene rizike povezane sa likvidnošću, dok su zalihe koksa bile procijenjene kao dovoljne za nesmetano odvijanje proizvodnog procesa do kraja prve trećine maja 2026. godine, uz potencijalnu nabavku dodatnih količina, a također, ukazano je na postojanje tržišnih uslova za plasman proizvoda, kao i na poduzete mjere racionalizacije troškova i unapređenja operativne efikasnosti. Izjavio je da kada su u pitanju eksterni rizici, snabdijevanje željeznom rudom istaknut kao dodatni rizik, imajući u vidu da je, prema dostupnim informacijama, Rudnik željezne rude „Ljubija“ podnio prijedlog za otvaranje stečajnog postupka, a koji je ujedno i jedan od značajnih povjerilaca dužnika, što može uticati na stabilnost budućeg snabdijevanja ovom sirovinom, a također, tržište čelika, kao jedan od bitnih faktora za nastavak poslovanja, sve vrijeme karakteriše prisutna potražnja na regionalnom nivou, ali i izražena konkurencija, posebno od strane proizvođača iz Turske, Kine i Evropske unije (Italija), te u takvim uslovima, ključni faktor održivosti poslovanja predstavlja odnos između cijene čelika i ukupnih troškova proizvodnje, odnosno ostvariva profitna marža, te s tim u vezi, eventualno donošenje mjera od strane nadležnih nivoa vlasti usmjerenih na zaštitu

domaće proizvodnje predstavljalo bi značajan faktor u očuvanju konkurentnosti i održivosti poslovanja. Na osnovu tako dostavljenih informacija i podataka od Uprave dužnika, istakao je da je proizlazila ocjena da postoji operativna i tehnološka sposobnost za nastavak poslovanja u toku prethodnog postupka, uz uslov adekvatnog upravljanja likvidnošću i postupanja u skladu sa Zakonom o finansijskom poslovanju, ali nakon dodatnih zahtjeva za dostavu preciznijih i ažurnih informacija i podataka, utvrđeno je da su informacije i podaci u određenoj mjeri nisu u potpunosti odražavali stvarno stanje ključnih pretpostavki za nastavak proizvodnje, naime 01.04.2026. godine, na osnovu informacija i podataka dostavljenih od strane uprave, planirano je gašenje visoke peći zbog ekonomske nerentabilnosti daljnjeg rada, s ciljem sprječavanja daljeg gomilanja gubitaka i obaveza društva, te s tim u vezi, 02.04.2026. godine, uprava društva je, na zahtjev privremenog stečajnog upravnika, dostavila dopunu informacija i podataka iz kojih proizilazi da su zalihe ključnih sirovina (posebno koksa) obezbjeđene isključivo za mjesec april 2026. godine, te da nakon tog perioda ne postoje osnovni uslovi za nastavak integralne proizvodnje čelika. Izjavio je da na traženje privremenog stečajnog upravnika, uprava dužnika je dostavila odluku o zaustavljanju gašenju Visoke peći od 02.04.2026. godine, zajedno sa pratećim tehnološkim cjelinama koje čine integralni dio proizvodnog procesa, i to pogona aglomeracije, Pripreme rude i Čeličane, a iz obrazloženja uprave proizilazi da je navedena odluka zasnovana na procjeni ekonomske nerentabilnosti daljnjeg rada u uslovima izražene nelikvidnosti, nemogućnosti osiguranja kontinuiteta u snabdijevanju ključnim sirovinama i energentima, te potrebe da se spriječi daljnje generisanje gubitaka, istovremeno, istaknuto je da se gašenje predmetnih postrojenja provodi u kontrolisanim-bezbjednim uslovima, očuvanju opreme i infrastrukture, zbrinjavanja radnika uz poštivanje tehničko-tehnoloških i zakonskih procedura. Prema dostavljenoj obavijesti kriznog štaba Nove Željezare Zenica-Termin plan obustave proizvodnje u Novoj Željezari Zenica, održanog 09.04.2026. godine, proces gašenja počinje 20.04.2026. godine, a završava 15.05.2026. godine, u kojem periodu je potrebno dodatno osigurati nesmetano snabdjevanje plinom i električnom energijom. Istakao je da navedena okolnost predstavlja dodatni indikator narušene finansijske stabilnosti društva, te nosi značajan operativni rizik, imajući u vidu da može dovesti do pojave radničkog neposluha, smanjenja radne discipline i otežanog odvijanja proizvodnog procesa, naročito u osjetljivoj fazi kontrolisanog gašenja visoke peći, te da je navedena odluka imala direktan i presudan uticaj na daljnju ocjenu mogućnosti nastavka poslovanja, gašenjem visoke peći prestaju osnovni tehnološki uslovi za integralnu proizvodnju čelika, te od 20.04.2026. godine, odnosno 15.05.2026. godine nije moguće nastaviti proizvodnju u postojećem obliku, također u kontekstu analize mogućnosti nastavka poslovanja, Uprava i stručne službe ukazali su da je od posebnog značaja i aktuelna regulatorna i tržišna kretanja u regionu i Evropskoj uniji, koja direktno utiču na poziciju stečajnog dužnika. Izjavio je da dodatno, najavljene zaštitne mjere Evropske unije, čija je primjena planirana od 1. jula 2026. godine, dodatno kompliciraju tržišnu poziciju, da prema dostupnim informacijama, iste podrazumijevaju značajno smanjenje postojećih uvoznih kvota (za približno 47%), uvođenje carine od 50% na količine iznad kvote, kao i primjenu pravila „melt & pour“, čime se ograničava mogućnost da se proizvodi od čelika koji potiču iz trećih zemalja (npr. Kina, Iran, Rusija), a samo su prerađeni u drugim državama, plasiraju na tržište EU, da u konačnici, predmetne okolnosti predstavljaju bitan ograničavajući faktor pri razmatranju mogućnosti nastavka poslovanja, naročito u segmentu izvoza i prerade, te zahtijevaju dodatno oprezan i restriktivan pristup u procjeni ekonomske opravdanosti bilo kojeg modela daljnjeg rada. Istakao je da slijedom navedenog, ovakav model proizvodnje, prema ocjeni stručnih službi, u ovom trenutku nije ekonomski opravdan, te bi njegovo pokretanje moglo biti suprotno principu očuvanja i zaštite stečajne mase i interesa povjerilaca, a istovremeno, ukazuje se da bi se navedeni model mogao razmatrati isključivo uslovno, u slučaju promjene ključnih tržišnih parametara, uz prethodnu potvrdu pozitivnog finansijskog efekta i održivog novčanog toka, te shodno naprijed navedenom, zaključuje se da je nastavak poslovanja nakon gašenja Visoke peći moguć u onoj mjeri u kojoj isti objektivno doprinosi očuvanju i eventualnom uvećanju vrijednosti stečajne mase, te zaštiti interesa povjerilaca. Istakao je da u tom smislu, a na osnovu izjašnjenja stručnih službi stečajnog dužnika, kao pravno i ekonomski prihvatljiv okvir djelovanja, proizilazi da je opravdano usmjeravanje aktivnosti na plansku i organizovanu prodaju postojećih zaliha gotovih proizvoda, kao najbržeg i najmanje rizičnog izvora prihoda, pri čemu je neophodan aktivan tržišni pristup kroz neposredne pregovore sa postojećim i novim kupcima, proširenje baze kupaca i intenziviranje komercijalnih aktivnosti, sve u cilju očuvanja vrijednosti zaliha i sprječavanja njihovog obezvredjenja, u protivnom, u situaciji kada bi nastavak poslovanja vodio ka generisanju dodatnih gubitaka ili povećanju rizika, isti ne bi bio u funkciji zaštite

stečajne mase, te kao takav ne bi bio opravdan. Izjavio je da nakon izvršenog obilaska poslovnih prostorija dužnika, raspoložive poslovne knjige-finansijske izvještaje za 2025. godinu i ostalu dokumentaciju koja se nalazi u spisu predmeta, kao izvršenog popisa imovine, je utvrdio sljedeće: u postupku identifikacije imovine stečajnog dužnika izvršen uvid u bilans stanja na dan 31.12.2025. godine, na osnovu kojeg je utvrđeno da su u okviru dugotrajne materijalne imovine evidentirane i nekretnine i to prvenstveno kroz poziciju zemljišta u iznosu od 19.369.038 KM, kao i građevinskih objekata u iznosu od 54.760.974 KM, a iz predmetne evidencije posebno se izdvajaju sljedeće nekretnine: objekat centralnog skladišta (masivna građevina sa više etaža), poslovni objekti, metalni hangari i hangari od lima, skladišta, kao i objekti sa ugrađenom opremom i infrastrukturu, uključujući i benzinsku pumpu kao specifičan infrastrukturni objekat, također utvrđeno je da pokretnu imovinu čini veći broj pojedinačnih sredstava različite vrste, namjene i starosti, koja su evidentirana kao materijalna sredstva u okviru dugotrajne imovine, te prema svojoj prirodi, pokretna imovina obuhvata: radnu i manipulativnu opremu, uključujući viljuškare, paletare, mjerne uređaje i druga tehnička sredstva, informatičku i komunikacionu opremu, kao što su računari, printeri, projektori, telefonski i drugi uređaji, kancelarijski namještaj i opremu, uključujući stolove, stolice, ormare, ladice i slična sredstva, uređaje za održavanje i radne uslove, poput klima uređaja, kuhinjskih aparata i druge prateće opreme, ostalu pokretnu opremu i sitni inventar, koji se koristi u redovnom poslovanju, te da društvo posjeduje ukupno 64 vozila sa relevantnim tehničkim i registracionim karakteristikama (marka, model, godina proizvodnje, status registracije i dr.), a koji čine sastavni dio pokretne imovine dužnika. Izjavio je da u dijelu finansijske imovine, značajnije stavke odnose se na potraživanja, prije svega potraživanja od kupaca u iznosu od 31.193.257 KM (ovo je samo presjek stanja, jer se radi o varijabilnoj kategoriji) kao i druga kratkoročna potraživanja, što ukazuje da dio vrijednosti imovine čine potraživanja čija će naplativost biti predmet posebne analize u daljem toku postupka, također, utvrđeno je postojanje vlasničkog udjela stečajnog dužnika u drugim pravnim licima, a dodatnim provjerama kroz Registar poslovnih subjekata utvrđeno je da stečajni dužnik ima vlasnički udio u privrednom društvu „Toplana d.o.o. Zenica“. Izjavio je da prema podacima iz registra, ukupni kapital navedenog društva iznosi 23.469.960,00 KM, pri čemu je stečajni dužnik „Nova Željezara Zenica d.o.o. Zenica“ evidentiran kao osnivač sa učešćem u kapitalu u iznosu od 15.255.474,00 KM, što predstavlja većinski udio u predmetnom društvu, od navedenog iznosa, 3.911.660,00 KM odnosi se na novčani kapital, dok se 11.343.814,00 KM, odnosi na kapital unesen u stvarima, navedeno ukazuje da predmetni vlasnički udio može predstavljati značajnu imovinsku vrijednost u okviru stečajne mase, naročito imajući u vidu njegovu nominalnu visinu i karakter većinskog učešća, međutim, nominalna vrijednost kapitala ne mora odgovarati stvarnoj tržišnoj niti likvidacionoj vrijednosti predmetnog udjela, te je neophodno izvršiti dodatne provjere i analize, uključujući uvid u finansijske izvještaje društva „Toplana d.o.o. Zenica“, procjenu njegove imovine, obaveza i poslovanja, kao i eventualno angažovanje sudskog vještaka ekonomske struke, te da tek nakon provedenih navedenih radnji biće moguće utvrditi stvarnu vrijednost ovog udjela i njegov potencijal za namirenje povjerilaca u okviru stečajnog postupka. Izjavio je da shodno navedenom, jasno proizilazi da imovina dužnika može pokriti troškove postupka. Što se tiče obaveza izvršen je uvid u Izvještaj o finansijskom položaju (Bilans stanja) stečajnog dužnika na dan 31.12.2025. godine, te druge poslovne evidencije, sa posebnim osvrtom na strukturu i visinu obaveza, na osnovu izvršenog uvida, utvrđeno je da ukupne obaveze stečajnog dužnika iznose 374.402.729 KM, što predstavlja dominantan dio pasive i ukazuje na visok stepen finansijske opterećenosti dužnika, struktura obaveza ukazuje da je najveći teret zaduženja koncentrisan u obavezama prema dobavljačima, te da ukupne evidentirane obaveze prema dobavljačima iznose 317.307.614,71 KM, od čega se 240.200.698,04 KM odnosi na dospjele, a 77.106.916,67 KM na nedospjele obaveze, što jasno ukazuje da pretežni dio obaveza ima karakter dospelih, a neizmirenih dugovanja i predstavlja snažan pokazatelj izražene nelikvidnosti dužnika. Izjavio je da u kontekstu ukupnih obaveza stečajnog dužnika, ukazuje da je u predmetnom postupku, po nalogu suda, sačinjen Nalaz i mišljenje sudskog vještaka ekonomske struke, kojim je izvršena detaljna analiza solventnosti dužnika na osnovu relevantnih finansijskih izvještaja i pratećih analitičkih evidencija, da je sudski vještak ekonomske struke kao stručno i nepristrasno lice, dao svoj nalaz i mišljenje zasnovano na relevantnoj finansijskoj i analitičkoj dokumentaciji, te privremeni stečajni upravnik isto prihvata kao vjerodostojno i stručno utemeljeno i u cijelosti se oslanja na njegove zaključke i isti je sastavni dio ovog izvještaja, te shodno naprijed navedenom, daje mišljenje da kod stečajnog dužnika postoje razlozi za otvaranje stečajnog postupka iz člana 6. Zakona o stečaju-platežna nesposobnost dužnika, jer stečajni dužnik 60 dana neprekidno ne

izmiruje svoje dospjele a potraživane novčane obaveze, da je stečajni dužnik, da je organ ovlašten za zastupanje stečajnog dužnika podnio prijedlog za otvaranje stečajnog postupka u roku od 60 dana od dana upisa u sudski registar kao organ ovlašten za zastupanje, da stečajni dužnik posjeduje imovinu koja može pokriti troškove stečajnog postupka, te da se poslovanje stečajnog dužnika može nastaviti u cjelini do momenta gašenja Visoke peći, a nakon njenog gašenja može se nastaviti djelomično, u obimu i na način koji će biti utvrđen u daljem toku prethodnog postupka, a koji će biti u interesu stečajne mase i povjerioca.

Sud je nakon što je ocjenio sve dokaze priložene uz prijedlog, te nalaz i mišljenje vještaka o ekonomsko-finasijskom stanju imovine stečajnog dužnika dat od stalnog sudskog vještaka ekonomske struke Babić Adisa kao i Izvještaj privremenog stečajnog upravnika o postojanju razloga i uslova za otvaranje i vođenje stečajnog postupka nad privrednim društvom Nova Željezara Zenica, d.o.o, Hadžirašidović Jasmina, utvrdio da je prijedlog dopušten, da postoji stečajni razlog i da će imovina stečajnog dužnika prema predviđanju biti dovoljna da pokrije troškove stečajnog postupka, te potraživanja povjerilaca ovisno o procjeni vrijednosti stečajne mase.

Sud je nakon uvida u dokaze priložene u spis, kao i u Izvještaj privremenog stečajnog upravitelja, Nalaz i mišljenje sudskog vještaka financijske struke, odlučio kao u izreci.

Sud je pored navedenog ovim rješenjem odredio dan i sat otvaranja postupka, imenovao stečajnog upravitelja sa liste stečajnih upravitelja, pozvao vjerovnike stečajnog dužnika da prijave tražbine i vjerovnike sa pravom osiguranja da obavijeste stečajnog upravitelja o svom pravu, te dužnike stečajnog dužnika da bez odlaganja izmire svoje tražbine, te je odredio i dan i sat za koji je zakazano ispitno i izvještajno ročište, a sve u skladu sa odredbama čl. 104., 105., 106., 107. i 108., Zakona o stečaju (Sl. Novine F BiH 53/21 i 19/25), budući da je naprijed navedeno i potrebno da sadrži rješenje o otvaranju stečajnog postupka.

PRAVNA POUKA

Protiv ovog rješenja stečajni dužnik može uložiti žalbu u roku od 8 (osam) dana po prijemu rješenja Kantonalnom sudu Zenica, putem ovog suda.

Stečajna sutkinja
Sanja Pavlić